

Di Fos Leta weh di Apasl

PETER

Rait

Weh dis buk deh taak bout

Di Apasl Peter sen dis fos leta tu di biliiva dem ahn ihn kaal dem, “Di pipl weh God wehn pik.” Demde biliiva wehn skyata aal uova Asia Minor. Di muos impuotant riizn wai Peter sen dis leta tu dem dah wehn fi inkorij dem, bikaaz dehn wende go chruu plenty traiyalz ahn sofarin fi dehn fiet. So, Peter rimain dem bout di Gud Nyuuz bout Jesus Christ, bout how Jesus ded ahn how ih kom bak tu laif, ahn bout how ihn pramis fi kom bak agen fi dem!

Peter tel dem seh dis pramis gi dem huop, ahn so ih gwain help dem fi bier'op weh dehn deh go chruu. Ihn tel dem seh di prablem dem dah ongl fi tes dem fiet fi si if ih chruu; ahn dat dehn gwain get dehn pie pahndat Die wen Jesus kom bak, if dehn stie strang. So dehn fi liv laik pipl weh dah fi Christ evry die!

How dis leta set op

Introdokshan *1.1-2*

Di Apasl Peter rimain di pipl dem bout di salvieshan weh God gi *1.3-12*

Peter inkorij di biliiva dem fi liv wan huoly laif *1.13-2.10*

Weh di biliiva dem fi du, wen dehn deh go chruu plenty traiyalz *2.11-4.19*

Di biliiva dem fi bii hombl ahn fi sorv wan anada *5.1-11*

Peter laas wod dem iina dis leta *5.12-14*

Di Apasl Peter rait tu Kristyan pipl aal uova di worl

1 ¹ Dis leta dah fahn mii, Peter, weh dah wan apasl a Jesus Christ. Ah deh rait dis leta tu aala di pipl dem weh God wehn pik, weh deh liv laik strienja skyata aal uova di sekshan dem weh dehn kaal Pontus, Galatia, Cappadocia, Asia ahn Bithynia. ² Bredrin: God, fi wi Faada, wehn pik unu weh dah ihn pipl fahn lang-lang taim abak. Ahn

chruu ihn Spirit ihn mek unu huoly, so dat unu obie Jesus Christ, ahn ihn blod mek unu kliin iina ihn sait!

So, Ah prie seh God gwain shuo unu plenty muo gries ahn piis iina unu haat!

Di riizn wai wi gat huop

³Bredrin, mek wi gi tanks tu God, di Faada a wi Laad Jesus Christ, bikaaz dah fi him griet morsy dah wai ihn mek wi kyan baan agen. Ahn siem taim ihn gi wi wan huop weh alaiv, sieka weh Jesus Christ riez'op bak fahn di ded! ⁴Ahn so, aala wi deh luk ahed tu di rich blesin dem weh God put'op fi wii iina hevn. Ahn demya blesinz gwain kyaahn ratn nar spail nar fiedaweh nontaim ataal! ⁵God gwain protek unu wid ihn griet powa til unu get dis salvieshan, bikaaz unu chros iina him. Ahn dis salvieshan gwain redy fi evrybody pahn dah Laas Die wen taim en.

⁶Unu gwain glad pahn Dat Die, bot rait now unu sad, sieka aal di troblz ahn haad taim dem weh unu hafy go chruu fi wan likl wail langa. ⁷Ahn dehn traiyalz dah fi pruv seh unu fiet dah di chruu ting. Memba: iivn guol, weh kyaahn laas, dehn tes wid faiya, ahn fi unu fiet wot plenty muo an guol! So unu fiet hafy tes wid faiya, so dat ih kyan laas lang. Den, pahn Dat Die wen Jesus Christ kom bak, unu gwain get priez ahn gluory ahn ana. ⁸Alduo unu neva si Jesus Christ yet, unu stil yet lov him, ahn alduo unu no deh si'im now niida, unu chros iina him. So, unu no gat di wod dem fi eksplien di griet jai weh unu fiil iina unu haat. ⁹Ahn disa jai fi nuo muo ahn muo, bikaaz di pie fi weh unu put unu fiet iina im, dah di salvieshan a unu suol!

¹⁰Ahn dis salvieshan dah wehn somting weh di prafit dem wehn waahn nuo muo bout. Dehn wehn prafisai bout dis gif weh God wehn waahn gi unu fahn lang-lang taim abak, ahn dehn wehn saach fi fain out bout'ih. ¹¹Dehn wende wanda dah wat di Spirit a Christ —weh deh iina dem— wende taak tu dem bout. Ihn tel dem fahn bifuor ih hapm bout how Christ wuda sofa ahn bout ihn gluory aftawod. Den, dehn wende wanda dah wen aala dis gwain hapm ahn dah huu ih gwain hapm tu. ¹²Bot God tel di prafit dem seh, weh dehn deh rait bout dah no fi dem benefit, bot dah fi unu. Dehn wehn taak bout demde tingz weh now unu deh hier fahn demya pipl weh deh priich di Gud Nyuuz chruu di powa a di Holy Spirit, weh kom fahn hevn. Demya dah di tingz dem weh iivn di ienjel dem wuda laik fi nuo bout.

Wi fi bii huoly

¹³So den, bredrin, get unu main redy fi akshan ahn kiip unusef aanda kanchruol aal taim. Set unu huop pahn dah speshal gries weh unu gwain get wen Christ kom bak. ¹⁴Obie God, bikaaz unu dah fi him pikniny. Ahn

no go bak, go liv dehn uol wikid wiez weh unu yuuztu liv —demde taim unu neva nuo no beta. ¹⁵Insida dat, unu fi liv wan huoly laif iina evryting weh unu du; jos laik God, weh pik unu fi bii fi him uon pikniny, bikaaz him huoly. ¹⁶Dat dah wai di Skriptyo seh, “Unu fi bii huoly, bikaaz Ai huoly.”

¹⁷Unu nuo seh God dah unu Faada, bot memba tu seh, ihn no gat non fievarit nontaim. Him gwain joj unu, or ihn gwain pie unu bai weh unu du. So den, spen di res a unu laif yah pahn ort, deh ana ahn rispek im! ¹⁸Unu nuo seh, God pie wan hai prais fi siev unu fahn dis wotlis wie a laif weh wehn paas dong tu unu fahn unu ansesta dem. Ahn di prais weh God pie dah neva silva nar guol weh kyaahn laas. ¹⁹Ihn pie fi unu wid di preshos blod a Christ di Lam a God, weh neva gat non sin ataal, ahn neva gat non spat nar maak pan im niida. ²⁰God wehn pik Christ iivn bifuor di worl wehn mek, bot now iina demya laas diez, ihn sen im dah ort fi evrybody si. Ahn ihn du dis fi unu. ²¹Dah bikaaz a Christ unu kyan chros iina God. Ahn bikaaz God riez'op bak Christ fahn di ded ahn gi'im gluory, unu kyan put unu fiet ahn huop wid kanfidens iina God!

²²Now, az bredda ahn sista iina Christ, unu kyan gat chruu lov fi wan anada, bikaaz unu obie di Gud Nyuuz weh dah di chruut, ahn so now unu kliin fahn sin. So den, si tu it dat unu riily lov wan anada wid aala unu haat. ²³Unu baan agen chruu God Wod weh alaiv ahn gwain laas fareva. Unu no baan agen fahn wan muma ahn pupa fahn dis ort, bikaaz di laif weh dehn gi'yo gwain en'op iina det. Bot disya nyuu laif gwain laas fareva, bikaaz ih kom fahn God Wod, weh alaiv ahn gwain laas fareva. ²⁴Dah jos laik weh di Skriptyo seh:

“Hyuuman bi'in dah jos laik graas,
weh iizy fi ded.

Dehn pritinis fied-weh iina nontaim ataal,
jos laik som prity flowaz.

²⁵Bot di Wod a di Laad gwain laas fareva!”

Ahn dat Wod dah di Gud Nyuuz weh dehn priich tu unu!

Jesus dah di Stuong weh Livin

2 ¹So bredrin, unu fi stap deh du di tingz dem weh hot ada pipl, ahn deh trai fuul dem op. Unu no fi bii wan hipokrit, nar jalas afta nonbady, nar taak bad bout dem niida! ²Insida dat, siem laik how dehn nyuu baan bieby no waahn notn els eksep dehn muma milk, unu fi tek God Wod laik milk ahn drink'ih plenty taim so ih kyan mek unu gruo iina unu salvieshan; ³bikaaz dah laik weh di Skriptyo seh, “Unu don ties ahn si how gud di Laad gud!”

⁴So den, kom tu di Laad. Dah him dah di Stuong weh Livin, weh ihn pipl wehn rijek bot weh God don pik, bikaaz Christ wehn uova preshos

tu im! ⁵Ahn unu dah stuon weh livin tu, so mek God yuuz unu fi bil wan spiritwal hous. Unu dah priis weh huoly, so di Laad Jesus gwain help unu fi aafa sakrifais tu God weh ihn gwain aksep. ⁶Dah jos laik weh God wehn seh iina di Skriptyo, wen ihn seh:

“Si, luk, Ah deh put wan briki iina Zion.

Dah wan chief kaana-stuon weh Ai pik —di muos impuotant wan—

ahn dah stuon ongl preshos tu mi!

Dah him weh no gwain disapaint nonbady, weh put dehn chros iina him!”

⁷Yees, him preshos tu aala demde pipl weh chros iina him; bot tu dehn pipl weh no chros, di Skriptyo seh:

“Di stuon weh di bilda dem neva tink wehn wot notn, ton out fi bii di muos impuotant wan outa aala dem!”

⁸Ahn ih rait iina di Skriptyo tu seh:

“Dis dah di stuon weh mek di pipl dem bok dehn fut dem ahn stombl,

ahn dah stuon gwain mek dem faal dong!”

Demde pipl trip uova ih, bikaaz dehn neva obie weh God seh. So weh hapm tu dem, dah weh God wehn plan fi hapm tu dem!

⁹Bot unu dah di speshal pipl dem weh God wehn pik out. Unu dah priis weh dah fi God, di King. Unu dah wan nieshan weh God set wan-said fi ihnself. God bring unu fahn outa daaknis ahn put unu iina fi him wandaful lait. Now unu hafy tel evrybady aal di wandaful tingz weh God wehn du. ¹⁰Wan taim wehn deh, wen unu dah neva nonbady; bot now unu dah God pipl dem! Wan taim nonbady neva shuo unu morsy; bot now God shuo unu morsy!

Liv how God sorvant dem shuda liv

¹¹Mi dier fren dem, unu dah no fi disya worl; unu dah farina ahn strienja. So, Ah deh waan unu: unu no fi giv iin tu dehn sinful fiilin weh deh fait gens unu uon suol! ¹²Unu fi liv iina soch a wie mongs di pipl dem weh no nuo God, dat iivn wen dehn deh akyuuz unu seh, unu deh du di tingz dem weh wikid, demya pipl hafy uon'op ahn seh dah neva chruu. Ahn di gud tingz weh unu du, gwain liid dem fi biliiv ahn gi God ana pahndat Die wen ihn kom bak fi joj di worl!

¹³Ahn fi di Laad siek, put unuself aanda di pipl dem weh gat atarity iina disa worl: di king weh dah di haiyis atarity, ¹⁴ahn di govana dem weh ihn put fi ponish demde kain a pipl weh brok di Laa, ahn fi pie dem pipl weh dah gud sitizn. ¹⁵God waahn unu fi du weh gud, so dat unu kyan shet op demde kain a man weh no nuo notn ahn laik taak fuulishnis. ¹⁶Unu dah no sliev; unu frii! Bot, no bikaaz unu frii, unu

gwain yuuz dat laik wan ekskyuus fi go du rang. Unu frii fi liv laik wan sliev weh dah fi God! ¹⁷Unu fi rispek evrybody, ahn shuo speshal lov fi unu breda ahn sista dem weh dah biliiva. Unu niid fi fier God ahn rispek di King.

Fala Christ egzampl

¹⁸Ahn unu sorvant, unu niid fi obie unu maasta ahn aalwiesz shuo dem rispek. No ongl du dis wen dehn kain tu unu ahn kansida unu, bot wen dehn kruwil tu unu tu. ¹⁹God gwain bles unu, if unu wilin fi tek di pien fi somting weh unu no dizorv, bikaaz unu waahn pliiz him. ²⁰Bot nuu dat unu kyaahn get non kredit fi tek di pien fi somting rang weh unu du. Bot God gwain bles unu, if unu wehn hafy sofa fi somting gud weh unu wehn du. ²¹Aftaraal, God kaal unu fi sofa, if unu gwain fala iina di fut-step dem weh Christ lef. Dah him wehn lef wan porfek egzampl wen ihn sofa fi wii.

²²“Him neva sin,

ahn ihn neva fuul'op nonbady niida.”

²³Wen di pipl dem wehn insult Christ, ihn neva insult dem bak. Wen ihn wende sofa, ihn neva tret dem. Ihn lef dem tu God, bikaaz God ongl joj striet. ²⁴Ahn Christ himself ker fi wi sin dem iina fi ihn bady pahn di kraas, so dat wi kuda ded tu sin ahn liv fi weh rait. Dah chruu di kot ahn di bruuz dem weh ihn wehn sofa fi wi, wii kyan get hiil. ²⁵Unu dah wehn laik shiip weh laas dehn wie, bot now unu kom bak tu di Wan weh dah unu Shepad ahn weh protek unu suol!

How waif ahn hozban dem fi liv tugeda

3 ¹Siem wie, evry wan a unu marid uman fi put unu hozban fos. Den, if som a unu hozban no biliiv God Wod, unu kyan win im uova fi biliiv jos bai di wie unu bihiev. Unu no gwain iivn hafy seh wan wod tu im, ²bikaaz ihn gwain si how unu liv wan kliin laif ahn waahn ana God iina aal weh unu du! ³Unu no fi dipen pahn di tingz dem, laik fansy hie-duu, nar uova dier chien ahn iez-ring dem, nar non fansy kluoz niida fi mek unu luk byuutiful. ⁴Insida dat, unu byuuty fi kom fahn iinsaida unu: di byuuty a wan jentl ahn kwaiyet spirit weh no gwain fied-weh, bot gwain laas fareva! Iina God sait, dat dah di byuuty weh preshos tu im. ⁵Lang taim abak, dat dah how dehn uman —weh yuuztu waaship God ahn put dehn huop iina im— wehn mek demself byuutiful. Dehn yuuztu put dehn hozban fos. ⁶Sarah, Abraham waif, dah wehn laik dat. Shii wehn obie Abraham ahn kaal im “maasta.” Ahn unu dah fi shii daata, if unu du di rait ting ahn no fried fi du'ih.

⁷Iina di siem wie, unu hozban fi ana unu waif ahn aalwiesz triit im wid rispek wail unu liv tugeda. Memba seh: shii dah di wiika wan, bot siem

taim shii dah wan iikwal paadna iina di gif a wan nyuu laif weh God wehn gi wi! If unu triit im di rait wie, den unu praya dem no gwain get hinda nontaim.

Som taim wii gwain sofa iivn duo wi deh du di rait tingz

⁸Di laas ting Ah gat fi tel unu dah dis: Aala unu niid fi gat di siem tinkin ahn kansaan fi wan anada, so dat unu lov wan anada laik bredda ahn sista lov wan anada. Ahn unu fi bii kain ahn ombl tu wan anada. ⁹Bot, if somebody du unu somting bad, unu no fi du somting bad bak tu dem. Ahn, if somebody insult unu, unu no fi insult dem bak agen niida. Insida dat, aks God fi bles dem, bikaaz dat dah weh God waahn unu fi du —ahn den ihn gwain bles unu! ¹⁰Bikaaz ih rait dong iina di Skriptyo seh:

“If unu waahn mek unu laif hapy,
ahn liv wan gud laif,
unu no fi taak bad tingz,
ahn unu no fi tel non lai niida.

¹¹Unu fi ton unu bak pahndiknis ahn du demya tingz weh gud.
Unu fi work haad fi liv iina piis wid evrybody.

¹²Bikaaz di Laad deh kiip wach uova dehn pipl weh deh liv rait,
ahn ihn aalwiez lisen tu dehn prayaz.

Bot di Laad ton ihn fies gens demde kain a pipl weh du wikidnis.”

¹³Bredrin, dah huu gwain waahn hot unu, if aal di taim unu deh du gud? Nonbody. ¹⁴Bot iivn if unu sofa wen unu deh du gud, unu hapy, bikaaz God gwain bles unu far ih! So den, no fried fi nonbody; nar unu fi dedeh deh worry bout weh dehn maita du tu unu. ¹⁵Insida dat, unu fi waaship Christ az Laad a unu laif. Ahn if enybady aks unu bout di huop weh unu gat bikaaz unu dah wan biliiva, unu fi reddy fi eksplien ih tu dem. ¹⁶Bot unu fi du'ih iina wan nais wie ahn wid rispek, so dat unu kyan stie wid wan kliin kanshans. Den, if som pipl taak bad bout unu, dehn gwain fiil shiem wen dehn si di gud laif unu liv, bikaaz unu dah fi Christ. ¹⁷Memba seh: ih muo beta fi sofa bikaaz unu deh du weh rait, if dat dah weh God waahn, an fi unu sofa bikaaz unu deh du demde kain a tingz weh no rait! ¹⁸Christ wehn sofa fi unu tu, wen ihn wehn ded fi wii sinaz wans ahn far aal. Him wehn neva sin, bot ihn ded fi wi sin dem, so dat ihn kuda bring aala wi sief huom tu God. Bikaaz Christ wehn sofa wen dehn put ihn bady tu det, bot den ihn riez'op bak iina di spirit!

¹⁹Ahn, dah wen Christ wehn iina di Spirit, wen ihn gaan, gaan priich tu di spirit dem weh wehn iina prizn. ²⁰Demya dah wehn di spirit a demde pipl weh neva obie God, wen ihn wende wiet pahndiknis dem wid pieshens, wen Noah wende bil ihn big-big buot. Bot, dah wehn ongl eight pipl wehn gaan iina di buot ahn neva get jrondid iina dat griet flod.

²¹Ahn datde flod waata dah laik di waata a wan parabl fahn wi baptizam

weh siev wi now. Baptizam dah no fi wash aaf di dort fahn aafa wi bady, bot dah di pramis weh wi mek tu God seh wi gwain waak kliin, so dat wi kyan nuo seh wi no gilty iina fi him sait. Ih siev wi chruu weh Jesus Christ wehn du, wen ihn riez bak op fahn di ded. ²²Den, Christ gaan op iina hevn weh paat ihn deh sidong pahn di rait han saida God. Ahn now ihn deh ruul uova aal di ienjel, ahn di atarity, ahn di powa dem —aala dem hafy du weh ihn seh dehn fi du!

How fi liv fi God

4 ¹So den, bikaaz Christ sofa yah iina ihn bady iina dis worl, unu fi tink jos laik how Christ wehn tink. So, wen unu deh sofa, unu gwain bii strang tu, bikaaz sin kyaahn kanchruol nonbady wen dehn deh sofa. ²Fahn yah go bak, unu niid fi liv di res a unu laif yah pahn ort deh du weh God waahn unu fi du, ahn no weh unu fiil fi du. ³Unu don spen nof taim bak den deh du dehn tingz weh di pipl dem weh non nuo God du. Unu yuuztu spen unu taim deh go dah wail paaty, unu jrink ahn get jronk, unu liv wan slak laif, ahn unu ful a los. Unu yuuztu du di muos disgostin tingz dem, ahn unu yuuztu waaship di aidal dem tu. ⁴Ahn now, unu fren dem weh unu yuuztu gat, dehn sopraiz seh unu no waahn jain dem agen fi du dehn wikidnis weh unu yuuztu du. So, dehn ton roun ahn insult unu! ⁵Bot jos memba seh demde kain a pipl gwain hafy gi akount tu God weh gwain joj aala dem, di livin ahn di ded! ⁶Dat dah wai di Gud Nyuuz wehn priich iivn tu demde pipl weh don ded. Bikaaz alduo dehn ded —jos laik evrybody— dehn wehn get wan chaans fi fain laif iina di spirit chruu obie weh God waahn dem fi du.

Tek gud kier a God gif dem

⁷Bredrin, unu main! Di en a di worl suun kom, so unu hafy get siiryos ahn kanchruol unusef, so dat unu kyan prie gud. ⁸Ahn di muos impuotant ting an aal: unu fi lov wan anada wid chruu lov, bikaaz lov kova plenty sin. ⁹Ahn unu fi uopm unu huom tu wan anada bitout deh komplien nontaim. ¹⁰Memba seh: God wehn bles evry wan a unu wid wan a ihn speshal gif dem, so unu kyan yuuz ih fi sorv ada pipl. ¹¹So, if unu gat di gif fi priich; wel, priich God Wod gud. If unu gat di gif fi help ada pipl; wel, du'ih wid aala di strent weh God gi'yo. Unu fi du evryting so dat ih kyan bring ana tu God chruu Jesus Christ weh gat aal di gluory ahn powa iina him fareva ahn eva. Amen!

Sofarin bikaaz wii deh chros iina Jesus

¹²Mi dier fren dem, wan neks ting: unu no fi fraitn wen unu deh go chruu dehn traiyalz weh bon unu laik faiya, laik if dah somting strienj deh hapm tu unu. ¹³Insida dat, unu fi glad seh, unu deh get di chaans fi

shier iina Christ sofarin, bikaaz aftawod unu gwain get di jai fi shier iina ihn gluory tu, wen di taim kom fi dehn shuo ih tu di pipl a disya worl.

¹⁴So den, kount'ih wan blesin wen dehn insult unu bikaaz unu dah wan biliiva iina Christ. Dis shuo seh God Spirit deh wid unu! ¹⁵Bot, if unu dah wan mordara, wan tiif, wan kriminal, or sombody weh laik faas iina pipl bizniz, wel den, unu dizorv fi sofa! ¹⁶Bot, if unu sofa bikaaz unu dah wan chruu Kristyan, unu no hafy shiem den. Insida dat, tank di Laad seh unu sofa fi him siek. ¹⁷Unu pipl: Main, di taim fi jojment deh yah, ahn ih gwain staat fos mongs God uon pipl dem! Ahn if God jojment staat wid wii, unu kyan imajin how teribl ih gwain bii teribl fi demde pipl weh rifyuuz fi biliiv di Gud Nyuuz fahn God! Dah laik weh di Skriptyo seh:

¹⁸“If di pipl weh raichos ongl get-weh,
bai di skin a dehn tiit,
weh unu tink gwain hapm,
tu di sina dem ahn demya pipl,
weh no gat non rispek fi God?”

¹⁹So den, if unu deh sofa bikaaz dat dah weh God waahn fi unu, kiip aan deh du weh rait ahn put unuself iina God han —di Wan weh mek unu— bikaaz him no gwain fiel unu nontaim!

Weh di eldaz ahn di yong man dem fi du

5 ¹Now, Ah deh taak tu di chorch elda dem mongs unu. Mii dah wan elda tu ahn Ah dah wan wiknis ah weh Christ sofa, so Ah gwain shier iina ihn gluory weh ihn gwain shuo wi. Unu chorch eldaz, Ah deh beg aala unu ²fi bii laik wan shepad fi di flak weh God wehn gi unu, ahn so tek kier a di shiip dem —laik weh God waahn unu fi du— ahn no bikaaz unu hafy du'ih. Du dah work bikaaz unu riily waahn sorv, no jos fi di mony. ³Ahn no deh baas'op di pipl dem weh deh iina unu kier niida; bot reda, bii wan egzampl tu dem, ⁴so dat wen di Chiif Shepad kom bak, unu gwain get wan kroun a gluory weh gwain neva fied-weh.

⁵Siem wie, unu yonga pipl fi obie unu elda dem. Di chruut dah seh, aala unu niid fi ombl unuself ahn sorv wan anada, bikaaz di Skriptyo seh:

“God fait gens dehn pipl weh proud,
bot ihn help dem weh ombl.”

⁶So, unu fi ombl unuself aanda di maity powa a God, ahn ihn gwain ana unu fi shuor wen di prapa taim kom. ⁷Ahn unu fi chruo aala unu woriz ahn kier pahn God, bikaaz him kier bout unu!

⁸Stie pahn unu gyaad tu, ahn wach out! Unu enemy —weh dah di devl— him dah laik wan laiyan weh deh ruor. Him deh waak roun fahn plies tu plies deh si huu ihn kyan iit'op! ⁹So unu hafy stie strang iina unu fiet, so unu kyan stan op gens im. Memba seh: di ada biliiva dem aal uova di worl deh go chruu dehn siem kain a sofarin dem.

¹⁰Bot, afta unu don sofa fi wan likl wail, di God a Gries —weh kaal unu fi bii wan wid Christ Jesus fi shier ihn gluory weh gwain laas fareva— him gwain mek unu bii aal weh unu supuoaz fi bii. Ahn ihn gwain mek unu strang, ahn ihn gwain help unu so unu no gwain shieky iina unu fiet. ¹¹Memba tu seh: aal powa dah fi wi Laad Jesus Christ fareva ahn eva. Amen!

Di Apasl Peter laas griitin dem

¹²Bredrin, Ah deh rait unu dis shaat leta. Ahn Silas, weh dah wan fietful biliiva, deh help mi du'ih. Di riizn wai Ah deh rait dis leta dah fi inkorij unu ahn fi mek unu nuo seh unu kyan chros di chruu gries a God no mata weh gwain hapm tu unu! ¹³Unu sista chorch —weh deh dah Babylon, weh God wehn pik— sen seh fi tel unu, heluo. Ahn mi son, Mark, sen heluo tu.

¹⁴Hiel'op wan anada wid wan huoly kis.

Ah prie piis fi aala unu weh dah wan wid Christ!